

## 宋太祖至仁宗朝鄉貢考

林 瑞 翰

### 科 目

宋代取士之途有三，生徒由學館，不由學館而舉者曰鄉貢，而天子自詔曰制舉。

宋代貢舉科目可考者有進士、九經、五經、開元禮、三史、三禮、三傳、學究、明經、明法等科。故亦謂之科舉。宋史選舉志科目上：

初，禮部貢舉，設進士、九經、五經、開元禮、三史、三禮、三傳、學究、明經、明法等科。

開寶六年，改開元禮爲開寶通禮科。永樂大典卷一二三〇六引李燾續資治通鑑長編（以下簡稱長編）開寶六年四月辛丑：

翰林學士盧多遜等上所修開寶通禮二百卷、義纂一百卷，並付有司施行，詔改鄉貢開元禮爲鄉貢通禮，本科並以新書試問。

景德二年，改義纂曰義疏，舉是科者問本經及義疏共十道，以六通爲合格。（長編卷六十景德二年七月丙子龍圖閣待制戚綸與禮部貢院上言）

宋代特重進士科，長編卷五十三咸平五年十一月庚申河陽節度判官張知白上疏：

今進士之科，大爲時所進用，其選也殊，其待也厚。

而宋代得士，亦以進士爲盛。宋史卷一〇八選舉志一科目上：

宋之科目，有進士，有諸科，而進士得人爲盛。

馬永卿懶真子卷三：

本朝取士之路廣矣，得人之盛，無如進士。蓋有一榜有宰相數人者，古無有也。

太平五年，蘇易簡下李沆、向敏中、寇準、王旦，咸平五年，王曾下王隨、章得象，淳化三年，孫何下丁謂、王欽若、張士遜，慶曆三年，楊質下王珪、韓絳、王安石、呂公著、韓頴、蘇頌，其餘名臣不可勝數，此進士得人之明效大驗也。

若九經以下等科則通謂之諸科，宋史選舉志科目上所謂宋之科目有「進士」「諸科」是也。諸科「專取記誦」（長編卷一〇九天聖八年八月癸巳資政殿學士晏殊言），「止以誦數精粗爲中否」（長編卷一八一至和二年十月知制誥王珪言），故不爲時人所貴，即朝廷遇諸科舉士禮數亦較進士稍殺。宋史卷一〇八選舉志一科目上：

端拱元年，知貢舉宋白等定貢院故事。先期三日，進士具都榜引試，借御史臺驛使官一人監門，都堂簾外置案，設銀香鑪，唱名給印試紙。及試中格，錄進士之

文奏御，諸科惟籍名而上。俟制下，先書姓名散報之，翌日，放榜唱名。既謝恩，詣國學謁先聖先師，進士過堂閣下告名。聞喜宴分爲兩日，宴進士請丞、郎、大兩省，宴諸科請省郎、小兩省。

長編卷七七祥符五年二月癸丑：

上謂宰臣曰：「聞貢院試諸科學人，皆解衣閱視，慮其挾藏書冊，頗失取士之體，宜令止之。」

又如范鎮東齋記事卷一：

禮部貢院試進士日，設香案於階前，主司與舉人對拜，此唐故事也。所設坐位供帳甚盛，有司具茶湯飲漿。至試學究則悉撤帳幕氈席之類，亦無茶湯，渴則飲硯水，人人皆黔其吻。非故欲困之，乃防氈幕及供應人私傳所試經義。蓋嘗有試者，故事爲之防。歐文忠公詩：「焚香禮進士，撤幕待經生。」以爲禮數重輕如此，其實自有爲之。

鎮雖云貢院不爲經生備茶湯，乃以防弊，非故欲困之，然以歐陽修之閑習掌故，猶以爲貢院待經生之禮減於進士，則宋人之重進士而輕諸科，由是可知。

由釋褐授官亦可見朝廷待進士、諸科之輕重。如咸平五年王曾榜，得進士王曾以下三十八人，九經、諸科八十一人，並賜及第，曾以下進士五人爲將作監丞，通判諸州，其餘進士及九經及第者爲大理評事，知大縣，九經以外諸科及第者僅得判司簿尉（長編卷五十一）。是諸科惟九經得比進士，餘科皆不得與進士等列。又如景德二年李迪榜，第進士爲五等，諸科爲三等，進士第一等爲試校書郎，知令錄，第二等至第五等及諸科並爲判司簿尉，則是並九經亦不得比進士之高等。

九經者，指禮記、春秋左氏傳、毛詩、周禮、儀禮、周易、尚書、春秋穀梁傳、公羊傳。其中以禮記、左氏傳爲大經，毛詩、周禮、儀禮爲中經，周易、尚書、穀梁傳、公羊傳爲小經。若大經皆通，中經、小經各一，孝經、論語兼通，是爲五經；若大經、中經、小經各通其一，是爲三經；三史謂史記、前後漢書、三國志；學究謂學究一經（唐書卷二十四選舉志）。以上皆唐制，迄宋沿襲未改。惟太祖開寶七年，詔學究兼習詩、書、易（永樂大典一二三〇六引長編開寶七年二月壬辰詔），至太宗太平興國四年，詔學究併通三經，諒難精至，仍分爲三科（長編卷二〇太平興國四年十一月丙戌詔），則是仍爲學究一經也。惟按長編卷二六雍熙二年四月丙子條：

分周易、尚書各爲一科，附以論語、孝經、爾雅三小經，毛詩專爲一科。

卷三〇端拱二年三月壬寅：

中書令史守當官陳貽慶舉周易學究及第。

是自太平興國四年至雍熙二年間，復嘗合周易、尚書爲一科，雍熙二年復分爲二，端拱

二年陳貽慶舉周易學究是也。又長編卷一〇九天聖八年六月乙巳：

詔禮部貢院治尚書、周易二經者，自今皆分場考試。時言者謂書、易本兩科，先朝并爲一，故更定之。

則是書、易二科，真宗朝復嘗併而爲一，天聖八年復分之。論語、孝經、爾雅三經，不獨立科目，但附於諸科令兼通之，是爲兼經。唐制明經先帖文，口試經問大義十條，答時務策三道（唐書卷四十四選舉志），然至宋但帖書墨義，觀其記誦而已（宋史卷一〇八選舉志一科目上），是以同於諸科，不爲世重，其後遂廢。仁宗嘉祐二年十二月，詔別置明經科，與諸科別試，有明兩經、三經或五經，試以墨義、大義、論語、孝經及時務策，出身視進士等（長編卷一八六嘉祐二年十二月戊申詔）。嘉祐三年，禮部貢院詳定科舉條制，凡州郡取解，明經雖係諸科解名而別立解額（長編卷一八七嘉祐三年三月辛巳條），然宋人獨重進士科如故。明法嘗廢於太平興國四年，以是科於諸書中所業非廣故也（長編卷二〇太平興國四年十一月丙戌詔）。雍熙二年復置，仍兼試論語、孝經、爾雅三經（長編卷二六雍熙二年四月丙子條）。

## 秋 解 春 闈

凡舉子赴考，先試於本州軍之貢院，謂之解試，合格者上於禮部，以待來春考試。宋史卷一〇八選舉志科目上：

禮部貢舉，皆秋取解，冬集禮部，春考試。

取解又謂之發解，凡解試並在八月，故亦謂之秋解（吳自牧夢粱錄卷十五貢院條）。李心傳建炎以來朝野雜記（以下簡稱朝野雜記）甲集卷十三諸路同日解試條：

祖宗舊制，諸路州軍科場並以八月五日鎖院，惟福建去京師地遠，先期用七月，川廣尤遠，又用六月。

取解舉人，舊以十月二十五日上名於禮部，景祐四年，用臣僚議，改以十一月二十五日爲限。長編卷一二〇景祐四年二月甲寅：

詔禮部貢院自今三月一日申請貢舉，其舉人到省以十一月二十五日爲限。先是崇政殿說書賈昌朝言，舉人有親戚仕本州或爲發解官及侍父母遠官距本州二千里，宜敕轉運司選官類試，以十率之，取三人。詔兩制議，而翰林學士丁度等言，貢舉舊制，以五月一日申請，十月二十五日上名於省，若二千里而移試，或有不及，願稍寬其期，如昌朝說，故降是詔。

若解試黜落者多，則令本州選官覆試。如長編卷七六大中祥符四年十一月庚申詔：

聞河朔諸州解送舉人，艱於考覈，頗多黜落，令轉運使於落解舉人至多處，遣官別加考試合格人送禮部。

又卷八三大中祥符七年十月乙亥：

詔諸州解送舉人內黜落多處，宜令本州選官覆試，取藝學優長者送禮部。

此外，舉人亦有免取解而徑赴禮部試者。如長編卷八三大中祥符七年十月乙亥詔：

進士諸科其曾經殿試并河北、陝西諸科曾經終場及他州兩經終場下第者悉免取解。

卷一〇四天聖四年閏五月己卯：

詔禮部貢舉進士實應三舉、諸科五舉，並免取解。

同卷天聖四年十月乙酉：

詔進士諸科嘗經先朝御試而今不預薦者許就省試。

不豫薦即落解。凡此皆免取解之例。然取解覆試及免解皆取一時恩旨，權宜爲之，非有定制。故趙昇朝野類要卷二免解條釋免解云：

在學及格或遇特恩。

在學及格謂學館生員，容俟另文討論。此云特恩，謂取一時恩旨，權宜爲之也。然則雖經取解遇禮部試其不第者或過省試而殿試黜落者，若非遇特恩，次科仍須經解試取解。

王楙燕翼詒謀錄卷一進士免解條：

進士舊無免取解，若三舉連中則是九年，三舉不連中則有二三十年者。

此云若三舉解試連中，而禮部試并殿試黜落，則九年猶爲白身，若三舉解試不連中，則有困於科場至二三十年者。宋自治平以後，定制三年一貢舉，故三舉不中爲九年。亦是云無特恩免解，則雖經禮部試或殿試黜落，次科仍須取解也。

凡取解，以在本州爲準，若寄籍他州以應選，謂之寄應，爲法所嚴禁。長編卷六〇景德二年七月丙子龍圖閣待制戚綸與禮部貢院上言：

竊惟取士之方，合垂經遠之制，今諸色舉人各歸本貫取解，不得寄應及權買田產立戶。諸州取發寄應舉人，長吏以下，請依解十不一人例科罪。其開封府委官吏覺察，犯者罪如之。鄉里遐遠，久住京師者，許於國子監取解，仍須本鄉命官委保，判監引驗，乃得附學。

又宋史卷一〇八選舉志一科目上：

諸州土不還鄉里而竊戶他州以應選者嚴其法。

宋之所以嚴寄應之法，蓋諸州貢士各有解額，多寡不一。故解額少者諸州，舉人多寄應他州以利取解，然由是被寄應諸州解額乃被侵占，故易起爭訟。

解額最多者爲開封府，以其爲京師所在，士人之所萃聚，故冒籍寄應開封者亦最多，而爭訟亦多起於此。如長編卷九五天禧四年三月壬申條：

先是詔以近年開封府舉人稍多，屢致詞訟，令翰林學士承旨晁迥等議定條約。於

是迴等上言，諸州舉人多以身有服制，本貫難於取解，遂奔湊京輅，寓籍充賦。人數既衆，混而爲一，有司但考其才藝，解送之際，本府士著登名甚少，交起喧競，亦由於此。欲請自今有某週卑幼以下服者，聽取文解；寄應舉人，實無戶籍者，許召官保任，於本府戶籍人數外，別立分數薦送。詔從之。

舉人不寄應他州而奔轍於開封者，以開封解額遠較他州爲多之故。又長編卷一〇二天聖二年正月甲午：

詔開封府舉人無戶籍者，召有出身京朝官保二人，無出身曾歷任者保一人，外州召命官、使臣爲保，不得過一人，所保不實，以違制論。舉人兩處取解及犯徒而嘗以蔭贖者永不得入科場。時承平歲久，天下貢士益衆，間起爭訟，故條約之。

卷一〇八天聖七年十一月癸酉：

上封者言，今開封府舉進士者至於九百餘人，多妄冒戶籍，請條約之。癸酉，詔舉人有開封府戶籍七年以上，不居他處者，聽取解，雖無戶籍亦不會占名他州者，先經所屬投牒察訪行實，召京朝官二人保之，違犯則保官以違制論。其外州寄應者悉令還本貫。若行賂而妄冒鄉貫三代者，以違制失論，不以蔭贖。

爲減少舉人寄應開封府引起之爭訟，慶曆元年，詔增添外州解額。長編卷一三四慶曆元年十一月丙寅：

詔開封府進士緣外州舉人冒貫鄉戶，致本府人解送至少，其進士兩舉者令召命官三人並本縣官吏委保，聽直赴省試，外州解額令有司勘會，特與增添。

然所增添解額實不足以應舉士之需要。冒籍寄應開封府之另一實例，爲洪邁所藏咸平元年孫僅榜之小錄。洪邁容齋隨筆續集卷十三金花帖子條云：

此榜五十人，自第一至十四人，惟第九人劉燁爲河南人，餘皆貫開封府，其下又二十五人亦然。不應都人士中選若是之多，疑於方外人寄名託籍以爲進取之便耳。

取解之另一方式爲別頭試，亦謂之別試。皇祐五年，詔別試開封府、國子監試官親戚之取解者以避親嫌。長編卷一七五皇祐五年閏七月戊子：

詔開封府、國子監，其試官親嫌，令府、監互送，若兩處俱有親嫌，卽送別頭。

景祐四年，復令諸路仕宦他州隨侍子弟及親戚，路遠未能返本州取解者，別試於轉運司，謂之類試。長編卷一二〇景祐二年四月甲寅：

先是崇政殿說書賈昌朝言，舉人有親戚仕本州或爲發解官及侍父母遠官距本州二千里，宜敕轉運司類試，以十率之，取三人。詔兩制議，而翰林學士丁度等言，宜如昌朝說，自是諸路始有別頭試。

類試由轉運司主之，故亦謂之漕試。朝野類要卷二漕試條：

轉運司承集本路現任牒送到隨侍子弟及五服內親，如州府解試法。但漕司員額頗寬容也，係差本路官主文考試。

漕試而稱之類試者，謂其依舉人性質分類別試。蓋漕試不獨以待本路官員隨侍子弟及親戚，又以待寓居舉人之寄應他州者。如長編卷一八六嘉祐二年十二月戊申詔：

其不還鄉里而寓居他州以應選者，嚴其法。每秋試，自縣令佐察行義保任之，上於州，州長貳復審察得實，然後上本道使者類試。

此類別試，朝野類要謂之附試，其解額遠較仕宦侍親他州者為少。朝野類要卷二附試條：

因事在他鄉而未能歸本貫者，皆就轉運司附試，只是取人太少，却易為文才。凡類試別有解額，不占漕司所在州府之解額。

舉人取解後，則赴京師應禮部試，謂之省試。朝野類要卷二省試條：

就禮部貢院鎖試，名曰省試。

或曰省闈。岳珂程史卷八：

省闈故事，士子有疑，許上請。

唐宋以來，謂禮部為春官，每榜則張於禮部南院之東牆，故陳標詩云：「春官南院院牆東，曉色初明日色紅。」（謝維新古今合璧事類備要卷三十七登第條引，下簡稱合璧事類）而宋代省試皆在每歲之春。長編卷一九太平興國三年九月甲申：

上御講武殿覆試合格人。故事，禮部唯春放榜，至是秋試，非常例也。

故亦謂之春闈。大中祥符間，趙安仁嘗三知貢舉，史稱其「三典春闈，擇士平允」（宋史趙安仁傳）是也。

凡省試自命官知貢舉至放榜，歷時凡二月有餘，禁制嚴密，考校詳審。永樂大典卷一二三〇九引長編慶曆二年二月乙未知制誥富弼上言論省試有三長：

夫省試有三長，主文衡者四五人，皆一時詞學之選，又選命館閣才臣數人以助考校，復有監守、巡察、糊名、謄錄上下相警，不容毫釐之私，一長也。引試三日，詩賦所以見才藝，策論所以觀才識，四方之士得以盡其所蘊，二長也。貢院凡兩月餘，可以窮功悉力，三長也。

省試亦有別試之法，以試勢家子弟。太宗雍熙二年正月癸亥，命翰林學士賈黃中等九人權知貢舉，始令試官親戚別試（長編卷二十六），然此乃一時詔旨，而非定制。眞宗始詔自後試官親戚悉牒送別頭考校，著為令（王闢之澠水燕談錄卷六貢舉）。長編卷六八大中祥符元年四月壬寅：

上御崇政殿親試進士，命翰林學士李宗諤等八人為考官，直史館張復等八人為覆考官，侍御史周師望等二人糊名，給事中張秉、知制誥周起詳定等第。舉人周叔

良等百二十人訟知舉官朋附權要，抑塞孤寒。上曰：「舉貢榜議前代不免，朕今召所謂勢家子弟者別坐就試。」

又同卷大中祥符元年四月己未：

先是監察御史張士遜爲貢院監門官，時貢舉初用糊名之法。士遜曰：「主司有親戚在進士中，明日，當引試，願出以避嫌。」主司不聽，士遜乃自言引去。上是之，記名於御屏，遂詔自今舉人與試官有親嫌者皆移試別頭。

朝野雜記乙集卷十五殿試不避親條：

國朝之制，發解進士及省試皆置別頭場以待舉人之避親者。自總麻以上親及大功以上婚姻之家皆牒送，惟殿試則雖父兄爲試官亦不避，蓋以無別試故也。

又有鎖廳試，以待見任官之應舉者。宋史卷一〇八選舉志科目上：

凡命士應舉，謂之鎖廳試。所屬先以名聞，得旨而後解。

雍熙二年，以見任命官應舉者多，詔須才學優茂，歷官無過始得應鎖廳試，以杜其濫。

長編卷二六雍熙二年三月癸亥：

以鎖廳求試者多繆濫，始令諸道州府自今擇才學優茂而歷官無過者乃舉之，仍先奏俟報。

先是應鎖廳試者雖中選，只令遷官而不賜第，黜落者則停見任。自淳化三年，鎖廳試合格者始皆賜第。葉夢得石林燕語卷四見任官應舉條：

祖宗時見任官應進士舉，謂之鎖廳，雖中選止令遷官而不賜第，不中者則停見任，其愛惜科名如此。淳化三年，滁州軍事推官鮑當等應舉合格，各賜進士及第，自是遂皆賜第。

天聖四年，始詔應鎖廳試黜落者免責罰，仍聽再舉。長編卷一〇四天聖四年閏五月丁卯：

詔命官鎖廳應舉自今更不先試所業，下第者免責罰，仍聽再舉。其歷任有贓私罪及停廢責降衝替未經敘用人，即不許應舉。舊制，鎖廳應舉者先於所屬選官考試所業，方聽取解，至禮部程文紕繆者勒停，其不及格猶贖銅，永不得應舉。至是，上欲開誘進士之路，下近臣參議，而降是詔。

## 殿 試

殿試始於開寶六年宋準榜，因徐士廉伐鼓訟不公，太祖親御講武殿覆試，自是殿試遂爲常式。永樂大典卷一二三〇六引長編開寶六年三月：

辛酉，新及第進士雍丘宋準等十人、諸科二十八人詣講武殿謝。上以進士武濟川、三傳劉溶材質最陋，應對失次，絀去之。濟川，翰林學士李昉鄉人也。昉時

權知貢舉，上頗不悅，會進士徐士廉等擊登聞鼓，訴昉用情，取舍非當。上以問翰林學士盧多遜，多遜曰：「頗亦聞之。」上乃令貢院籍終場下第者姓名，得三百六十人。癸酉，皆召見，擇其一百九十五人，并準以下及士廉等，各賜紙劄，別試詩賦，命殿中侍御史李瑩、左司員外郎侯陟等爲考官。乙亥，上御講武殿親閱之，得進士二十六人，士廉預焉，五經四人、開元禮七人、三禮三十八人、三傳二十六人、三史三人、學究十八人、明法五人，皆賜及第。又賜準錢二十萬，以張宴會。責昉爲太常少卿，考官右贊善大夫楊可法等皆坐責，自茲殿試遂爲常式。

又卷一二三〇七引長編開寶八年二月戊辰，太祖覆試舉人王式等，並下詔曰：

向者登科名級，多爲勢家所取，致塞孤寒之路，甚無謂也。今朕躬親臨試，以可否進退，盡革曩昔之弊矣。

是榜得進士王嗣宗以下及諸科凡六十四人，前此雖御試而名次未有升降，至是御試與省試始有升降之別。

凡廷試於殿廊設幔，列坐席，標姓名，使無得遷易，既就坐，然後摹印詩賦論題以給之。長編卷六十八大中祥符元年四月壬寅條：

上御崇政殿親試進士，仍錄題解摹印以示之。初於殿廊設幔，列坐席，標人姓名，又揭榜表其次字，令視訖就坐。

又卷七十七大中祥符五年三月己丑條：

上御崇政殿親試禮部合格貢舉人，殿之廊廡分列位次，署其名氏，仍揭於榜，使無得遷易，始摹印詩賦論題以試，官給紙起草。

先是唐禮部試詩賦論題，舉子或未知所出，得進問題意，謂之上請。宋既增殿試，猶襲故事，景祐元年三月始罷其制。長編卷一四四景祐元年三月丙子條：

詔御試進士題目書所出摹印給之，更不許上請。

又石林燕語卷八：

唐禮部試詩賦題，不皆有所出，或自以意爲之，故舉子皆得進問題意，謂之上請。本朝既增殿試，天子親御殿，進士猶循用禮部故事。景祐中，稍厭其煩瀆，詔御藥院具試題，書經史所出模印給之，遂罷上請之制。

燕翼詒謀錄卷五廷試不許上請條：

舊制御試賦論，士人得上請於殿陛之下，出題官臨軒答之，往復紛紛，殊失尊嚴之體。景祐元年三月丙子，詔進士題具書史所出，御藥院印給，士人不許上請，自後進士各伏其位，不敢復至殿廷。

宋初進士過禮部試赴殿試，內有黜落者，如開寶六年宋準榜，武濟川、劉溶皆以應

對失次被黜。咸平二年孫暨榜，諸科被黜落者六人（長編卷四十四咸平二年二月癸亥條）。又咸平五年王曾榜，禮部所解進士七十二人，而殿試復落其半，及第者僅三十八人（歐陽修歸田錄卷二）。寶元元年呂溱榜，參知政事韓億四子並預南省奏名而皆黜落，以億見在政路故也（長編卷一二一寶元元年三月甲寅條）。嘉祐二年章衡榜，乃盡取禮部奏名進士三百八十八人，並賜及第及同出身，自是進士與殿試者始皆不黜落（長編卷一八五嘉祐二年三月丁亥條）。燕翼詒謀錄卷五殿試士人不黜落條：

舊制殿試皆有黜落，臨時取旨，或三人取一，或二人取一，或三人取二，有累經省試取中，屢擯棄於殿試者。嘉祐二年三月辛巳，詔進士與殿試者皆不黜落，迄今不改。

又邵伯溫聞見前錄卷一：

本朝祖宗以來，進士過省赴殿試尚有被黜者。遠方寒士殿試下，貧不能歸，多至失所，有赴河而死者。仁宗聞之惻然，自此殿試不黜落，雖雜犯亦收之末名，為定制。

殿試分等以第優劣，其制始於太宗。太平興國二年正月戊辰，上御講武殿覆試進士，命翰林學士李昉、扈蒙定其優劣為三等，得呂蒙正以下一百九人；庚午，覆試諸科，得二百七人，並賜及第（長編卷十八）。太平興國五年蘇易簡榜，復分第進士、諸科並為甲乙二等（長編卷二十一太平興國五年閏三月甲寅條）。雍熙元年，進士始分三甲（宋史卷一〇八選舉志科目上）。真宗景德二年李迪榜，重第進士為五等，第一、第二、第三等賜及第，第四、第五等同出身；又第諸科為三等，分賜本科及第、出身、同出身（長編卷五十九景德二年三月甲寅條）。大中祥符二年梁固榜，重定進士為五等，曰上次，曰中上，曰中次，曰下上，曰下次（長編卷七十一祥符二年六月庚戌條）。祥符四年張師德榜，詔以學識優長、詞理精絕為第一等，才思該通、文理周密為第二等，文理俱通為第三等，文理中平為第四等，文理疏淺為第五等（長編卷七十六大中祥符四年十一月甲戌條）。仁宗景祐元年張唐卿榜，又定進士為五甲（長編卷一一四景祐元年三月辛巳條），第一甲、第二甲賜進士及第，第三甲、第四甲賜進士出身，第五甲賜同進士出身（合璧事類卷三七殿試分第授官條引官品），世謂之黃甲。朝野類要卷二：

黃甲，正奏名五甲也，吏部謂之黃甲闕榜。

蔡確崇政殿放榜詩云：「黃帕開封出奏篇，銀袍二百玉階前。威顏咫尺瞻中展，名姓傳呼下九天。宮墨旋題黃甲字，禁門已簇杏花韉。孤臣拜賜交悲喜，相望先芬五十年。」

（合璧事類卷三十七殿試條引）

殿試唱名之制始於雍熙二年梁顥榜，長編卷二六雍熙二年正月：

己未，上御崇政殿御試禮部貢舉人，得進士須城梁顥等百七十人。庚申，得諸科

三百一十八人，並唱名賜及第，唱名自此始。

其後續行彌封、騰錄、覆考、編排之法。祥符四年，乃定殿試條制，舉人納試卷，內臣收之，先付編排所，編排官去其卷首鄉貫狀，以字號第之，付彌封院，彌封官騰寫校勘，用御書院印，始付考官定等訖，復彌封送覆考官再定等。編排官閱其異同，未同者再考之，如復不同，即以相符合者為定，始取鄉貫狀字號合之，乃第其名次並試卷以聞，遂臨軒唱第（長編卷七十六大中祥符四年十一月甲戌條），所費時不過十日（永樂大典卷一二三九九引長編慶曆二年二月乙未制誥富弼疏）。石林燕語卷八記唱第情形云：

故事，殿試唱名，編排官以試卷列御座之西，對號以次拆封，轉送中書侍郎，即以宰相對展進呈，以姓名呼之，軍頭司立殿陛下，以次傳唱。

先是南省奏名第一，殿試唱名至三人不及則抗聲自陳，必得升等。寶元元年李溱榜，范鎮禮部試奏名第一，殿試黜在下列，獨不肯言，遂退列二甲。長編卷一二一寶元元年三月庚申條：

先是上以開封府所解鎖廳進士陳博古等嘲謗籍籍，密詔博古及韓億四子并兩家門下士范鎮、家靜試卷皆勿考。鎮，成都人；靜，眉山人。考官奏鎮、靜實有文，久馳聲場屋，非附兩家之勢而得者，乃聽考而降其等級。鎮，禮部奏名為第一。故事，禮部第一人賜第未有在第二甲者，雖近下猶升之，吳育、歐陽修殿庭唱過第三人，亦抗聲自陳，鎮獨默然。至第七十九人，乃出拜，退就列，無一言，眾以是賢之。禮部第一人在第二甲自鎮始。

自是廷試當自陳者多慕效之（石林燕語卷九）。

慶曆間，議者頗以殿試考校為期既短，不能盡士之才，而考官取擇，程文考覆，亦難精審，請罷殿試，一依唐制，以禮部試為準。慶曆二年二月辛巳，詔罷殿試，而大臣亦有反對者，以為祖宗故事，不可遽廢。越三日，詔復殿試如舊。永樂大典卷一二三九九引長編慶曆二年二月：

舊制，諸州薦貢者，既試禮部，則引試崇政殿，而知制誥富弼言曰：「國家沿隋唐設進士科，自咸平、景德以來，為法尤密，踰於前代，而得入之道，或有未至。殿試考官，泛取而不擇，一短也；一日試詩賦論三篇，不能盡入之才，二短也；考校不過十日，不暇研究差次，三短也。若曰禮部放榜則權歸有司，臨軒唱第則恩出主上，則是忘取士之本而務收恩之末也。且歷代取士，悉委有司，獨後漢文吏課牋奏，副之端門，亦未聞天子親試也。至唐武后載初之年，始有殿試，此何足法哉。必慮恩歸有司，則宜使禮部次高下以奏，而引諸殿庭，唱名賜第，則與殿試無所異矣。」辛巳，詔罷殿試，而翰林學士王堯臣、同修起居注梁適以為祖宗故事不可遽廢。越三日癸未，詔復殿試如舊。

## 建隆至嘉祐諸榜

自建隆元年至嘉祐八年，其間一〇四年，宋舉士登第者凡五十榜，計太祖朝十五榜，太宗朝八榜，真宗朝十四榜，仁宗朝十三榜，各榜登第年代及人數如下：

太祖朝

1. 建隆元年楊礪榜，放進士十九人。

長編卷一建隆元年二月庚寅：

先是中書舍人安次、扈蒙權知貢舉，庚寅，奏進士合格者楊礪等十九人姓名。

2. 建隆二年榜，放進士十一人。

長編卷二建隆二年二月癸酉：

權知貢舉竇儀奏進士合格者十一人。

3. 建隆三年馬適榜，放進士十五人。

長編卷三建隆三年三月丙子：

權知貢舉王著奏進士馬適等合格者十五人。

4. 乾德元年榜，放進士八人。

長編卷四乾德元年二月：

是月，權知貢舉浚儀薛居正奏進士合格者八人。

5. 乾德二年榜，放進士八人。

長編卷五乾德二年二月丁酉：

權知貢舉陶穀奏進士合格者八人。

6. 乾德三年劉察榜，放進士七人。

長編卷六乾德三年二月丁巳：

權知貢舉盧多遜奏進士劉察等合格者姓名凡七人。

7. 乾德四年榜，放進士、諸科十五人。

長編卷七乾德四年二月辛酉：

權知貢舉王祐言進士合格者六人，諸科合格者九人。

8. 乾德五年榜，放進士十人。

長編卷八乾德五年二月壬申：

權知貢舉盧多遜奏進士合格者十九人，復詔參知政事薛居正於中書覆試，皆合格，乃賜及第。

9. 開寶元年榜，放進士十人。

長編卷九開寶元年三月癸巳：

權知貢舉王祐擢進士合格十人，陶穀子邴在第六。翌日，穀入致謝，上語左右曰：「聞穀不能訓子，邴安得登第？」遽命中書覆試，而邴復登第。因下詔曰：「造士之選，非樹私恩，世祿之家，宜敦素業。如聞黨與，頗容竊吹，文衡公器，豈容私濫？自今舉人凡關食祿之家，委禮部具析以聞，當令覆試。」

10.開寶二年安德裕榜，放進士七人。

長編卷十開寶二年二月丁卯：

權知貢舉趙逢奏進士安德裕等合格者七人。

11.開寶三年榜，放進士及特奏名諸科一一四人。

長編卷十一開寶三年：

三月壬寅朔，詔禮部貢院閱進士諸科十五舉以上曾經終場者以名聞。甲辰，得司馬浦等六十三人，庚戌，復取十五舉未經終場者四十三人，並賜出身，仍詔自今勿得為例。權知貢舉扈蒙擢進士合格者八人。

12.開寶四年榜，放進士十人。

永樂大典卷一二三〇六引長編開寶四年二月辛卯：

知制誥盧多遜權知貢舉，進士合格者十人。

13.開寶五年安守亮榜，放進士、諸科二十八人：

永樂大典卷一二三〇六引長編開寶五年閏二月壬辰：

權知貢舉扈蒙奏合格進士京兆安守亮等十一人，諸科十七人。上召對講武殿，始下詔放榜，新制也。

14.開寶六年宋準榜，放進士、諸科一二七人。

永樂大典卷一二三〇六引長編開寶六年：

三月辛酉，新及第進士雍丘宋準等十人、諸科二十八人，詣講武殿謝。上以進士武濟川、三傳劉濬材質最陋，應對失次，絀去之。濟川，翰林學士李昉鄉人也。昉時權知貢舉，上頗不悅。會進士徐士廉等擊登聞鼓，訴昉用情，取舍非當，上以問翰林學士盧多遜，多遜曰：「頗亦聞之。」上乃令貢院籍終場下第者姓名，得三百六十人。癸酉，皆召見，擇其一百九十五人，并準以下及士廉等，各賜紙劄，別試詩賦。命殿中侍御史李瑩、左司員外郎侯陟等爲考官。乙亥，上御講武殿親閱之，得進士二十六人，士廉預焉。五經四人，開元禮七人，三禮三十八人，三傳二十六人，三史三人，學究十八人，明法五人，皆賜及第。又賜準錢二十萬，以張宴會，責昉爲太常少卿，考官右贊善大夫楊可法等皆坐責，自茲殿試遂爲常式。

15.開寶八年王嗣宗榜，放進士、諸科六十四人。

永樂大典卷一二三〇七引長編開寶八年二月戊辰：

上御講武殿覆試，得進士王嗣宗以下三十人，諸科三十四人。

太宗朝

16. 太平興國二年呂蒙正榜，放進士、諸科五百人。

長編卷十八太平興國二年：

正月戊辰，上御講武殿，覆試進士，得河南呂蒙正以下一百九人。庚午，覆試諸科，得二百七人，並賜及第。又詔禮部閱貢籍，得十五舉以上進士及諸科一百八十四人，並賜出身，凡五百人。

17. 太平興國三年胡旦榜，放進士、諸科一四四人。

長編卷十九太平興國三年：

九月甲申朔，上御講武殿覆試合格進士，得渤海胡旦以下七十四人。乙酉，得諸科七十人，並賜及第。

18. 太平興國五年蘇易簡榜，放進士、諸科六五二人。

長編卷二十一太平興國五年閏三月甲寅：

上御講武殿覆試合格進士，得銅山蘇易簡以下百一十九人，又得諸科五百三十三人。

19. 太平興國四年王世則榜，放進士、諸科六九一人。

長編卷二四太平興國八年三月丙子：

上御講武殿覆試禮部貢舉人，擢進士長沙王世則而下百七十五人，諸科五百一十六人。

20. 雍熙二年梁顥榜，放進士、諸科四九七人。

長編卷二六雍熙二年三月：

己未，上御崇政殿覆試禮部貢舉人，得進士須城梁顥等百九十七人。庚申，得諸科三百一十八人。並唱名，賜及第，唱名自此始。

21. 端拱元年程宿榜，放進士、諸科九四八人。

長編卷二九端拱元年五月：

先是翰林學士禮部侍郎宋白知貢舉，放進士程宿以下二十八人，諸科一百人。謗既出，謗議蜂起，上意其遺才。壬寅，召下第人覆試於崇政殿，得進士馬國祥以下及諸科凡七百人。上既擢馬國祥等，猶恐遺材，復命右正言王世則等召下第進士及諸科於武成王廟重試，得合格數百人。丁丑，上覆試詩賦，又拔進士葉齊以下三十一人，諸科八十九人。

22. 端拱二年陳堯叟榜，放進士、諸科七一七人。

長編卷三〇端拱二年三月壬寅：

上御崇政殿試合格舉人，得進士閩中陳堯叟、晉江曾會等一百八十六人，並賜及第，諸科博平孫夷等四百五十人，亦賜及第，七十三人同出身。

23.淳化三年孫何榜，放進士、諸科一三一七人。

長編卷三三淳化三年三月：

戊戌，上御崇政殿，覆試合格進士，得汝陽孫何以下凡三百二人，並賜及第，五十一人同出身。辛丑，又覆試諸科，擢七百八十四人，並賜及第，百八十人出身。

真宗朝

24.咸平元年孫僅榜，放進士、諸科二百人。

長編卷四三咸平元年：

二月戊戌，詔以久停貢舉，頗滯時才，令禮部據合格人內進士放五十人，諸科百五十人，來歲不得為例。

十月癸丑，命修太祖實錄官錢若水等覆考開封得解進士卷，擢文行兼著者一人為首，仍以孫僅為第一。

（長編孫僅作孫暨。按暨乃咸平二年進士第一，此誤也。洪邁容齋隨筆續集卷十三科舉恩數條云：「咸平元年，孫僅但得防推，二年孫暨以下但免選注官。蓋此二榜真宗在諒闇，禮部所放，故殺其禮。」知此榜進士第一乃孫僅。）

25.咸平二年孫暨榜，放進士、諸科二四四人。

長編卷四四咸平二年二月癸亥：

詔今歲舉人頗衆，若依去年人數取合格者，慮有所遺落，進士可增及七十人，諸科增及一百八十人。禮部尋以孫暨等二百五十名聞，內諸科一舉者六人，特黜去，餘並賜及第。

26.咸平三年陳堯咨榜，放進士、諸科一八〇三人。

長編卷四六咸平三年三月甲午：

上御崇政殿親試，賜陳堯咨以下二百七十一人進士及第，一百四十三人同本科及三傳、學究出身。又考校諸科，得四百三十二人，賜及第、同出身。又試進士五舉、諸科八舉及嘗經御試或年逾五十者論一篇，得進士二百六十人，諸科六百九十七人，賜同出身及試校書郎、將作監主簿。上連三日臨軒，初無倦怠之色，所擢凡千八百餘人。其中有自晉天福中隨計者。較藝之詳，推恩之廣，近代所未有也。

27.咸平三年齊革榜，放河北、青、齊等州進士、諸科三五八人。

長編卷四七咸平三年：

先是詔都官郎中直史館劉蒙叟等試河北、青、齊等州舉人，得合格者五百八十二人，上親試之，於是賜進士齊革等十三人、諸科三百四十五人及第、同出身。

28.咸平五年王曾榜，放進士、諸科一一九人。

長編卷五一咸平五年三月己未：

上親試禮部舉人，得進士益都王曾以下三十八人，九經諸科八十一人，並賜及第。

29.景德二年李迪榜，放進士、諸科、特奏名一〇〇九人。

長編卷五九景德二年三月：

甲寅，上御崇政殿親試禮部奏名舉人，得進士李迪以下二百四十六人，第爲五等，第一、第二、第三賜及第，第四、第五等同出身，又得特奏名五舉以上一百十八人，第爲三等，並賜同進士、三傳、學究出身。翌日試諸科，得九經以下五百七十人，第爲三等，並賜本科及第、出身、同出身，又得特奏名諸科三禮以下七十五人，第爲三等，賜同學究出身、授試銜官。

30.景德二年范昭榜，放河北進士、諸科一四五六人。

長編卷六〇景德二年五月庚申：

先是詔禮部貢院別試河北貢舉人，其曾援城者進士雖不合格特許奏名，諸科例進二場至三場者特許終場，五舉及經御試并年五十者並以名聞。雖不更城守，應七舉年六十及瀛州有勞效者亦如之。庚申，上御崇政殿親試，凡七日，得進士范昭等五十一人，賜及第，四十五人出身，諸科賜及第、同出身、并試秩署州助教者六百九十八人，特奏名進士、諸科賜及第、出身至攝助教、隸殿侍者六百六十二人。

31.大中祥符元年姚煜榜，放進士、諸科八五九人。

長編卷六八大中祥符元年四月壬寅：

上臨軒試進士姚煜等一百六人及第，三人同出身，十五人同三禮出身，八十三人學究出身，九經以下及第、出身、試銜、助教者六百五十二人。

32.大中祥符二年梁固榜，放進士、諸科八十一人。

長編卷七一大中祥符二年六月庚戌：

先是工部侍郎張秉、知制誥周起以所試服勤詞學經明行修合格人聞，詔工部侍郎馮起、給事中薛映、龍圖閣待制戚綸、陳彭年鎖宿於秘閣覆考定之。庚戌，上御崇政殿親試，賜進士梁固等二十六人及等，同出身者三人，同三禮出身者二人，九經、五經、三禮、學究、明法及第者四十八人，同出身者六人。

33.大中祥符四年張師德榜，放進士、諸科八十一人。

長編卷七六大中祥符四年十一月丙子：

先是汾陰赦書舉服勤詞學經明行修之士，如東封例，準不覆考。丙子，上御崇政殿親試，賜進士張師德等二十一人及第，十八人同出身，諸科及第者四十二人，同出身者八人。

34.大中祥符五年徐奭榜，放進士、諸科五〇二人。

長編卷七七大中祥符五年三月己丑：

上御崇政殿親試禮部合格貢舉人，得進士建安徐奭而下及第者百人，同出身者二十六人，諸科及第者三百二十四人，同出身者五十二人。

35.大中祥符七年張觀榜，放亳州、南京路進士、諸科四十二人。

長編卷八三大中祥符七年九月戊戌：

上御景德殿試亳州、南京路服勤詞學經明行修舉人，得進士張觀等二十一人，諸科二十一人，賜及第，除官如東封西祀例。

36.大中祥符八年蔡齊榜，放進士、諸科、特奏名六四四人。

長編卷八四大中祥符八年三月：

戊戌，趙安仁等上禮部合格人數姓名。癸卯，上御崇政殿覆試，得進士蔡齊以下百九十七人，並賜及第，六人同出身，又賜六學以上特奏名進士七十八人同三禮出身，賜諸科三百六十三人及第、同出身、試將作監主簿。

37.天禧三年王整榜，放進士、諸科三一六人。

長編卷九三天禧三年三月丙寅：

上御崇政殿親試禮部奏名貢舉人，得進士王整以下六十三人，賜及第，八十六人同出身，又賜學究出身者一十三人，諸科及第者一百二人，同出身者四十七人，試將作監主簿者五人。

仁宗朝

38.天聖二年宋郊榜，放進士、諸科、特奏名六〇三人。

長編卷一〇二天聖二年三月：

癸卯，禮部上合格進士姓名。乙巳，上御崇政殿，賜宋郊、葉清臣、鄭戩等一百五十四人及第，四十六人同出身。不中格者六人，以嘗經眞宗御試，特賜同三禮出身。丙午，又賜諸科一百九十六人及第，八十一人同出身。

39.天聖五年王堯臣榜，放進士、諸科、特奏名一三一九人。

長編卷一〇五天聖五年三月：

乙丑，賜進士王堯臣等一百九十七人及第，八十三人同出身，七十一人學究出

身，二十八人試銜。丙寅，賜諸科及第并出身者又六百九十八人。

又同卷天聖五年四月：

癸酉，試特奏名進士及諸科。甲戌，賜同出身及試銜者凡二百四十二人。

40. 天聖八年王拱辰榜，放進士、諸科八十二人。

長編卷一〇九天聖八年三月：

甲子，御崇政殿試禮部奏名進士。丁卯，賜進士王拱壽等二百人及第，四十九人同出身。己巳，賜諸科及第、同出身者又五百七十三人。拱壽，咸平人也，詔更其名曰拱辰。

41. 景祐元年張唐卿榜，放進士、諸科、特奏名一六四〇人。

長編卷一一四景祐元年三月：

戊寅，御崇政殿試禮部奏名進士，己卯，試諸科，辛巳，試特奏名。已而得進士張唐卿、楊察、徐綬等五百一人，諸科二百八十二人，特奏名八百五十七人。

42. 寶元元年呂溱榜，放進士、諸科、特奏名一八七三人。

長編卷一二一寶元元年三月：

甲寅，御崇政殿試禮部奏名進士，乙卯，試諸科，丙辰，試特奏名。庚申，賜進士揚州呂溱等二百人及第，一百十人同出身，特奏名一百六十五人同諸科出身及爲諸州長史。辛酉，賜諸科四百十四人及第并出身，其特奏名被恩賜者又九百八十四人。

43. 慶曆二年楊寘榜，放進士、諸科、特奏名一二〇三人。

永樂大典卷一二三九九引長編慶曆二年三月：

乙丑，御崇政殿，賜進士楊寘等二百三十七人及第，八百二十二人出身，七十三人同出身。丙寅，賜諸科及第并同出身者四百七人，又賜特奏名進士、諸科三百六十四人同出身及補諸州長史、文學。

44. 慶曆六年賈黯榜，放進士、諸科、特奏名一六五四人。

長編卷一五八慶曆六年三月：

壬寅，御崇政殿，賜進士賈黯等二百三十人及第，一百九十人出身，一百七十七人同出身。癸卯，賜諸科及第并出身者四百十五人。甲辰，賜特奏名、諸科七百二人同出身及諸州長史、司馬、文學。

45. 皇祐元年馮京榜，放進士及諸科一〇九三人。

長編卷一六六皇祐元年三月：

乙巳，御崇政殿試禮部奏名進士。癸丑，賜進士馮京等一百七十四人及第，一百六十人出身，二百九人同出身。甲寅，賜諸科及第并出身五百五十人於觀文殿。

46. 皇祐五年鄭獬榜，放進士、諸科、特奏名二二三八人。

長編卷一七四皇祐五年三月：

辛酉，御崇政殿，賜進士鄭獬等二百人及第，一百五十人出身，一百七十人同出身。壬戌，賜諸科五百二十二及第、出身。丙寅，賜特奏名進士七十五人、諸科四百三十八人、廣南特奏名六百九十一人出身及試銜、文學、長史。

47. 嘉祐二年章衡榜，放進士、諸科、特奏名九九一人。

長編卷一八五嘉祐二年三月：

丁亥，賜進士建安章衡等二百六十二人及第，一百二十六人同出身。是歲進士與殿試者始皆不落。己丑，賜諸科三百八十九人及第，又賜特奏名進士、諸科二百十四人同出身及補諸州長史、文學。

48. 嘉祐四年劉輝榜，放進士、諸科、特奏名四〇四人。

長編卷一八九嘉祐四年三月丁未：

御崇政殿，賜進士鉛山劉輝等一百三十人及第，三十二人同出身，諸科一百七十六人及第、同出身，特奏名諸科六十五人同出身及諸州文學、長史。

49. 嘉祐六年王俊民榜，放進士、諸科、特奏名三三八人。

永樂大典卷一二四二八引長編嘉祐六年三月癸巳：

賜進士王俊民等一百三十九人及第，五十四人同出身，諸科一百二人及第并同出身，特奏名進士、諸科四十三人同出身及諸州文學、長史。

50. 嘉祐八年許將榜，放進士、諸科、特奏名四四一人。

長編卷一九八嘉祐八年三月甲子：

御延和殿，賜進士許將等一百二十七人及第，六十七人同出身，諸科一百四十七人及第、同出身，又賜特奏名進士、諸科一百人及第、同出身，又賜特奏名進士、諸科一百人及第、同出身、諸州文學、長史。

其中淳化三年孫何榜，登第者一三一七人，咸平三年陳堯咨榜一八〇三人，景德二年李迪榜一〇〇九人，景祐元年張唐卿榜一六四〇人，寶元元年呂溱榜一八七三人，慶曆二年楊質榜一二〇三人，慶曆六年賈黯榜一六五四人，皇祐元年馮京榜一〇九三人，而皇祐五年鄭獬榜登第者乃至二二三八人，科舉之盛，莫之爲比。

以上諸榜，有諒闇榜，封祀恩榜、河北恩榜及特奏名。

凡人主在諒闇則罷殿試，以省元爲榜首。朝野雜記甲集卷十三諒闇罷殿試條：

自咸平以來，人主有三年之喪則罷殿試，而以省元爲榜首。

真宗咸平元年孫僅榜，咸平二年孫鑒榜，仁宗天聖二年宋郊榜，皆諒闇榜也。

咸平三年，既放陳堯咨榜，復特試河北、青、齊等州舉人，得齊革以下進士、諸科

三五八人，景德二年，既放李迪榜，復特試河北貢舉人，是爲河北恩榜。蓋咸平間，眞宗方謀用兵幽薊，而景德元年契丹入寇，河北士人皆乘城捍禦，故眞宗特開此二科，廣示甄採。

大中祥符元年，眞宗東封泰山，三年，西祀汾陰，故大中祥符二年，詔舉東封所經州軍服勤詞學經明行修之士，四年，復詔試西祀所經州軍舉人如東封例，七年，援東封西祀例試亳州、南京路舉人，因有梁固、張師德、張觀三榜，是爲封祀恩榜。

特奏名蓋以優惠舉士之久困科場者。趙彥衛雲麓漫鈔卷四：

國朝進士累取不第者，限年許赴特奏名，號曰恩科。

宋史卷一〇八選舉志科目上亦曰：

其貢禮部而數黜者，得特奏名。

又曰：

凡士貢於鄉而屢絀於禮部，或廷試所不錄者，積前後舉數，參其年而差等之，遇親策士，則別籍其名以奏，經許附試，故曰特奏名。

特奏名之制實始自開寶三年。長編卷十一：

開寶三年三月壬寅朔，詔禮部貢院閱進士諸科十五舉以上曾經終場者以名聞。甲辰，得司馬浦等六十三人；庚戌，復取十五舉未經終場者四十三人，並賜出身。仍詔自今勿得爲例。

其後太平興國、咸平間屢嘗行之。長編卷十八太平興國二年正月戊辰：

詔禮部閱貢籍，得十五舉以上進士及諸科一百八十四人，並賜出身。九經七人不中格，上憐其老，特賜同三傳出身。

又長編卷四六咸平三年三月甲午：

又試進士五舉、諸科八舉及嘗經御試或年踰五十者論一篇，得進士二百六十人，諸科六百九十七人，賜同出身及試校書郎、將作監主簿。

然是時雖有特奏名之實而未正名，至景德二年李迪榜，始正其稱曰特奏名。是科得特奏名進士一百一十八人，諸科七十五人。景祐元年，仁宗念天下士嚮學者益蕃，而取人之路尚狹，詔禮部就試進士、諸科，進士三經殿試，諸科五經殿試，或進士五舉年五十以上，諸科六舉年六十以上，雖試文不合格，勿輒黜，皆以名聞（長編卷一一四景祐元年正月癸未）。是歲張唐卿榜，特奏名登第者至八百五十七人，雖云推恩多士，終不免流入於濫。於是仁宗用翰林學士承旨張抃等議，嘉祐元年四月丙辰，詔罷禮部特奏名，（長編卷一八二）然明年章衡榜，復放特奏名進士、諸科二百四十人（長編卷一八五），是旋罷旋復，終未能廢。

## 登第之榮寵

太平興國二年，呂蒙正等登第，皆先賜綠袍鞢笏，又錫宴於開寶寺，供帳甚盛，太宗復自爲詩二章以賜之。**長編**卷一八太平興國二年正月：

戊辰，上御講武殿，內出詩賦覆試進士，得河南呂蒙正以下凡五百人，皆先賜綠袍鞢笏，錫宴開寶寺，上自爲詩二章賜之。唐時禮部放榜之後，醵飲於曲江，號曰聞喜宴，五代多於佛舍名園。周顯德中，官爲主之。上命中使與領，供帳甚盛。

其後累朝因之，遂爲故事。**劉邠**貢父詩話：

太宗好文，每進士及第，賜聞喜宴，常作詩賜之，累朝以爲故事。仁宗在位四十二年，賜詩尤多。

其後移宴於瓊林苑，故世亦謂之瓊林宴。瓊林苑，乾德中置，爲汴京名園。**石林燕語**卷一：

瓊林苑、金明池、宜春苑、玉津園，謂之四園。瓊林苑乾德中置，太平興國中復鑿金明池於苑北，導金水河水注之，以教神衛虎翼水軍習舟楫，因爲水嬉。宜春院本秦悼王園，因以皇城宜春舊苑爲富國倉，遂遷於此。玉津園則五代之舊也。今惟瓊林、金明最盛，歲以二月開，命士庶縱觀，謂之開池，至上巳車駕臨幸畢卽閉，歲賜二府從官宴及進士聞喜宴皆在其間。

此外，復有期集、題名諸會，並沿襲唐制。**魏泰****東軒筆錄**卷六：

進士及第後，例期集一月，其醵罰錢奏宴局什物皆請同年分掌。又選最年小者二人爲探花，使賦詩，世謂之探花郎，自唐以來，勝勝有之。

**朝野類要**卷一題名條：

進士及第，各集鄉人於佛寺，作題名鄉會，此起於唐之慈恩寺塔也。

自唐以來，稱同榜及第者爲同年。探花，卽唐之探花會也。**秦中記**云：「進士杏園初會，謂之探花會。以少俊二人爲探花使，遍遊名園，若他人先得名花，則二人被罰。」唐有期集院，**唐摭言**所謂「進士榜出，謝後，便往期集院」，宋謂之期集所。**燕翼詒謀錄**卷五進士期集所條：

國初進士期集，以甲次高下率錢刊小錄，事遊宴。

小錄卽唐之金花帖子，列敘是科主司、同年、姓氏、鄉貫、三代之類，以素綾爲軸，貼以金花，故名之曰金花帖。**容齋隨筆續集**卷十三金花帖子條：

唐進士登科，有金花帖子，相傳已久，而世不多見。予家藏咸平元年孫僅榜盛京所得小錄，猶用唐制。以素綾爲軸，貼以金花，先列主司四人，銜曰翰林學士給

事中楊、兵部郎中知制誥李、右司諫直史館梁、秘書丞直史館朱，皆押字，次書四人甲子年若干，某月某日生，祖諱某，父諱某，私忌某，然後書狀元孫僅，其所紀與今正同。別用高四寸綾，闊二寸，書盛京二字，四主司花書於下，粘於卷首，其規範如此，不知以何年而廢也。四主司乃楊礪、李若拙、梁顥、朱台符，皆只爲同知舉。

唐制及第舉子尚須應吏部試，及格後始得除官，宋代舉子凡殿試及格，即由朝廷授以官職，其制亦始自太宗。太平興國二年呂蒙正榜，登進士第及諸科者凡五百人，第一、第二等進士并九經授將作監丞、大理評事，通判諸州，同出身進士及諸科並送吏部免選，優等注擬初資職事判司簿尉（長編卷十八太平興國二年正月戊辰條）。其後登第士子授官恩典雖有輕重，未嘗輒同，然大抵進士第一人初命官例除將作丞，餘人依等甲高下遞降有差。容齋隨筆續集卷十三科舉恩數條：

國朝科舉取士，自太平興國以來，恩典始重，各出一時制旨，未嘗輒同。士子隨所得而受之，初不以官之大小有所祈也。太平之二年，進士一百九人，呂蒙正以下四人得將作丞，餘皆大理評事，充諸州通判及監當。五年一百二十人，蘇易簡以下二十三人，皆將作丞通判。八年二百三十九人，自王世則以下十八人，以評事知縣，餘授判司簿尉，未幾世則等移通判，簿尉改知令錄，明年並遷守評事。雍熙二年二百五十八人，自梁顥以下二十一人，纔得節察推官。端拱元年二十八人，自程宿以下但權知諸縣簿尉。二年一百八十六人，陳堯叟、曾會至得光祿丞直史館，而第三人姚揆但防禦推官。淳化三年三百五十三人，孫何以下二人將作丞，二人評事，第五人以下皆吏部注擬。咸平元年孫僅但得防推，二年孫暨以下但免選注官。蓋此兩榜，真宗在諒闇，禮部所放，故殺其禮。及三年陳堯咨登第，然後六人將作丞，四十二人評事，第二甲百三十四人節度推官、軍事判官，第三甲八十人防團軍事推官。

又曾敏行獨醒雜誌卷十一：

故事，進士第一人初命官以將作監丞。

徐度却掃編卷上：

祖宗朝進士上三名皆作將作監丞、通判，故至今猶稱狀元爲監丞。

陳鵠耄舊續聞亦曰：「將作監丞，狀元恩例也。」（卷七張文定公條）若諸科則惟九經及第者得比進士高等，餘但得比同出身進士。特奏名惟進士第一等第一名得附正奏末名之下，第一等第二人以下但除京府助教及諸州助教（合璧事類卷三十八特科特奏格法條）。

進士第一人任諸州通判一任同即召試館職。江鄰幾醴泉筆錄卷上：

故事，狀元及第到任一年即召試充館職。

## 石林燕語卷六狀元任職條：

國朝以史館、昭文館、集賢院爲三館，皆寓崇文院，其實別無舍，但各以庫藏書，列於廊廡間爾。直館、直院謂之館職，以他官兼者謂之貼職。元豐以前凡狀元、制科一任還，卽試詩賦各一而入，謂之入館。

其後嘉祐三年，朝議以科舉四年一貢改爲間歲一貢，高第之人倍衆，欲損其任用恩典，乃詔進士第一人初命官但除大理評事，簽書兩使幕職事官，代還始陞通判，再任滿始召試館職。長編卷一八八嘉祐三年閏十二月丁丑條：

先是朝議以科舉既數，則高第之人倍衆，其擢任恩典宜損於故，詔中書門下裁之。丁丑，詔曰：「朕惟國之取士與士之待舉，不可曠而冗也，故立間歲之期，以勵其勤，約貢舉之數，以精其選，著爲定式，申敕有司。而高第之人，日嘗不次而用，若循舊例，終至濫官，甚無謂也。自今制科入第三等與進士第一除大理評事、簽書兩使幕職官事，代還陞通判，再任滿試館職。制科入第四等與進士第二、第三除兩使幕職官，代還改次等京官。制科入第四等次與進士第四、第五除試銜知縣，代還遷兩使職官，鎖廳人視此。若夫高材異行，施於有政而功狀較然者，當以茂恩擢焉。」自是驟顯者鮮，而所得人材及其風迹比舊亦浸衰。

太宗既崇文士，眞宗復繼以修文，大中祥符八年，蔡齊既大魁天下，眞宗特詔給金吾衛七人，兩節傳呼前引，榮寵之盛，前所未有，後遂以爲例。長編卷八四大中祥符八年三月癸卯條：

齊等既考定，上顧問王旦等曰：「有知姓名者否？」皆曰：「人無知者，眞所謂搜求寒俊也。」故事，當賜第必召其高第數人並見，又參擇其材質可者，然後賜第一。時新喻人蕭貫與齊並見，齊儀狀秀偉，舉止端重，上意已屬之。知樞密院冠準又言：「南方下國人，不宜冠多士。」齊遂居第一，上喜謂準曰：「得人矣。」特詔給金吾七騎，出兩節傳呼，因以爲例。

## 燕翼詒謀錄卷二進士第一人給金吾前引條：

舊制進士首選同唱第人皆自備錢爲鞍馬費，而京師遊手之民亦自以鞍馬候於禁門外，雖號廷魁，與衆無以異也。大中祥符八年二月戊申，詔進士第一人金吾司差七人導從，兩節前引，始與同列特異矣。

時人以爲狀元及第，雖將兵數十萬，恢復幽薊，獻捷太廟，其榮亦不可及也。儒林公議卷上：

太宗臨軒放榜，三五名以前皆出貳郡符，遷擢榮速。陳堯叟、王曾初中第，卽登朝領太史之職，賜以朱戟。爾後狀元登第者，不十餘年皆望柄用，人亦以是爲常，謂固得之也。每殿廷臚傳第一，則公卿以下無不聳觀，雖至尊亦注視焉。自

崇政殿出東華門，傳呼甚寵，觀者擁塞通衢，人摩肩不可過。錦繡綬轂，角逐爭先，至有登屋而下瞰者，士庶傾羨，譁動都邑。洛陽人尹洙，意氣橫蹠，好辯人也，嘗曰：「狀元登第，雖將兵數十萬，恢復幽薊，逐強虜於窮莫，獻捷太廟，其榮亦不可及也。」

自唐以來，稱省試進士第一人爲狀元，宋既增殿試，乃以殿試進士第一人爲狀元，而稱省試文魁爲省元。若解試、省試並魁者爲雙元，復魁殿試者謂之三元。朝野類要卷二三條：

解、省試並爲魁者謂之雙元，若又爲殿魁者謂之三元。

終北宋之世，爲三元者惟孫何、王曾、楊實、馮京四人而已。朝野雜記甲集卷十三國朝三元條：

孫漢公淳化二年舉進士，自開封至南省廷試皆第一，前未有也。至咸平五年，王沂公青州、南省、廷試皆第一。慶曆二年楊審言、皇祐元年馮當世復皆第一，宋有國二百餘年，爲三元者止此四人耳。

狀元雖貴，然北宋一百六十餘年間，爲相者惟呂蒙正、王曾、李迪、宋庠（仁宗更郊名曰庠）四人。避暑錄話卷上：

國朝狀元爲宰相，自呂文穆公蒙正後，五十年間，相繼得者三人，王沂公、李文定、宋元憲。元憲後百餘年間未有繼者。

石林燕語卷六：

國朝狀元爲相者四人，呂文穆公、王文正公、李文定公、宋元憲公。文穆登第十二年拜，文正二十一年，文定二十九年，元憲二十七年。文正、文定皆再入，而文穆三入爲尤盛。

南宋稱殿試進士第一、第二、第三人曰狀元、榜眼、探花，是爲三魁。雲麓漫鈔卷一：世目狀元第二人爲榜眼，第三人爲探花。

又吳自牧夢粱錄卷三士人赴殿試唱名條：

舊制，士人卷子仍彌封，卷頭打號，然後納初放官次下覆考，考定次第後，送定參詳一同，方定甲名資次，而定奪三魁。第一名狀元及第，第二名榜眼，第三名探花。

故榜眼、探花亦謂之狀元。洪邁夷堅志卷四十一鄒狀元書夢條，記鄒應龍爲士人時，夢到一處拾錢，得二十五文而止，慶元乙卯秋試，遂占第二。時邵武解額二十六人，說者云此居二十五人之上，有元字，狀元之謂也。又卷五十王資道及第條，記天台王居敬於淳熙十四年赴省試，夜宿太學舊齋舍，鐸工季松夢老翁云王必中第三名狀元，迨廷試唱名，果符所說。然則南宋之俗，通謂進士前三名爲狀元，故謂之三魁。

宋人稱狀元、榜眼、探花爲三魁，緣起何時，已不可考。按戴埴鼠璞探花郎條：

據言載唐進士賜燕曲江，置團司，年最少爲探花郎。本朝胡旦榜，馮拯爲探花，太宗賜詩曰：「二三千客裏成事，七十四人中少年。」蔡寬夫詩話亦言，期集擇少年爲探花，是否園賞花之會，使少年者探之，本非貴重之稱，今以稱鼎魁，不知何義。東軒筆錄謂期集選年少三人爲探花，使賦詩，熙寧余中爲狀元，乞罷宴席探花，以厚風俗，從之，恐因此訛爲第三人。

然則三魁之稱，似起於熙寧之後。惟自北宋咸平以來，進士前三名已爲朝野所重。如咸平元年孫僅榜，以僅爲第一，高輔堯第二，錢易第三（長編卷四十三咸平元年十月癸丑條）；大中祥符元年姚煜榜，以煜及第二、第三人爲將作監丞、大理評事，通判諸州，第四、第五人爲兩使推官（長編卷六八大中祥符元年四月壬寅條）；天聖二年宋郊榜，以郊爲第一，葉清臣第二，鄭戩第三（長編卷一〇二天聖二年三月丙午條）。景祐元年張唐卿榜，以唐卿爲第一，楊察第二，徐綬第三，並爲將作監丞，通判諸州（長編卷一一四景祐元年三月辛巳條）。又長編卷一二一寶元元年三月庚申條：

故事，禮部第一人賜第未有在第二甲者，雖近下猶升之。吳育、歐陽修殿庭唱第過三人，亦抗聲自陳。

又卷一四三慶曆三年九月丁卯范仲淹上十事疏，其三曰精貢舉云：

其南省考試之人，已經本鄉詢考履行，欲須彌封試卷，精考藝業，定奪等第訖，進入御前，選官覆考。內三人以上，即高等人中選擇聖意宣放。

然則進士前三名爲世所重，蓋由來有自矣。